

四庫全書

集部

欽定四庫全書

集部

陳白沙集卷七

詳校官庶吉士<sub>臣</sub>陳若霖

中書<sub>臣</sub>劉源溥覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>康 傑

欽定四庫全書

陳白沙集卷七

明 陳獻章 撰

五言律詩

題新村書齋壁

日色催江渡潮痕上石梯  
趁墟村婦出索哺襁兒啼  
樹接黃村塢船移白石溪  
落花誰省記何必武陵迷

再題

茅棟依巖靜柴門斫竹通桑榆  
巷南北煙火塢西東一

逕漁樵入孤村井臼同隣家得美酒吹笛月明中

新年

陰雨方連日新年損物華呼兒酌我酒騎馬到誰家  
黯寒雲密蕭蕭暮景斜人生正無賴狼藉任桃花

今日勝元日江天乍放晴呼瓶汲井水煮茗待門生  
山鳥鳴將下桃花暗復明所嗟人易老況復歲華更

朝雨黃鸝靜春風暗蕊低極知來令節未肯踏深泥  
狼藉桃無語侵尋草滿蹊還聞騎馬客躑躅向沙堤

止客宿

為恨開年雨江村馬跡稀諸君能枉拜今夕不須歸歲  
酒堪投轄人家欲掩扉仍聞僕夫語畏逐駿蹄飛

暮雨客去

入郭路初暝過橋客已勞僕夫亦人子馬足徇吾曹春  
色歸詩妙花枝愛酒豪良宵只孤負遮莫雨蕭騷

送客

濃綠新春酒疎紅隔水花官人坐馬醉江路遠山斜桃

李成春徑牛羊散暮沙林泉無宿客興盡且還家

登陶公壯哉亭

新亭開石窟遠勢借崑崙天地雙眸迴滄溟一口吞公  
來席不暖士死廟長存憶昔干戈際南征萬馬奔

是夕范生小酌

日月雙輪轉乾坤一氣旋是時冬始閏細雨夜如年人  
語斜風外天機落葉邊憑誰給燈火更坐讀殘篇

至容貫宅

在昔偶相遇如今共白頭敝衣寒露肘破屋早知秋家  
業憑觚翰厨煙管去留老夫如辟穀與子入羅浮

福童灌園

綰瓶行百步池在小橋東抱甕雖無忝寒衣却未豐數  
畦仍待綠十趾遂流紅口腹終同及能無愧此童

寄胡寧壽康齋先師之甥

年華當轉鳥詩思更塗鴉父子皆吾友箕裘一舅家人  
猶思嶺北書不到天涯莫作妻孥計浮生日易斜

石門

白髮非公事扁舟進此門  
山雲寒不雨江路曲通村  
玩世吾何有長途馬不存  
晚來堪一醉江月照空樽

悅城

山作旌幢擁江緋鏡面平  
舟航乘曉發雲日入冬晴  
鼓到江心絕槎衝石角橫  
經過悅城曲無語笑浮生

歲晚江上追次王半山韻

山寒煙錯寞江曉日荒涼  
水際風巾動梅邊鵲屐香  
低



頭挈小榼拍手笑輕航何但供遊走而須此日光

辱和拙作見示九日醉中再次奉答

激楚嗟難和霓裳更可同更闌朱鳥下聲斷碧雲中稍  
歇沾花雨還吹落帽風萬松期不至半偈欲騰空

九日馬默齋送姑蘇酒至次韻奉答

姑蘇一壺酒九日到山開即事焉能賦頽齡漫愛杯清  
風生菊徑落日滿溪臺酩酊藜床上雲來覆老萊

求荔枝栽貞節堂

高榜近東溟朝光滿北楹欲便清晝睡須待綠陰橫名  
木從誰假幽居賴母成君家多黑葉火急送雙莖

華山飛翠

何處青天外穹然起一丘山名疑屬我詩景盡歸樓九  
夏雲長潤千巖翠欲流野夫好遊走衰病只羅浮

對鶴

潦倒溪翁誰人疑鳥不疑閒將鶴起舞不作老無奇任  
病還親酒雖慵不廢詩悠然清唳外一枕到皇羲

吾晚病兼貧麻衣穩稱身朝來叅兩鶴花底作三人日出東南雨鶯啼宇宙春三杯下衫袖拂拭舊龍唇

題羅一峰贈馬龍道南卷

花發春來少愁添老去長高才想傾蓋昨夜語連床天下羅公佛湖西馬子香離筵一杯酒歌苦莫相忘

飲陂頭

入崦花叢密遵陂石路高柴門過午飯村老對春醪水白都如練風清不作刀自然五字句非謝亦非陶

吳村弔莊節婦墓

豺虎何由近風濤浩若無行人看墓榜英爽在清都江  
暝雲長合原寒草不枯乾坤不朽事持此報君夫  
此里有此墓千年亦不磨世方逐蔡琰吾甚敬曹娥淫  
盜死殊色良人及逝波江翻練裙帶激烈有遺歌

懷古次韻王半山

三徑五株柳孤村獨板門先生正高卧衆鳥莫交喧晉  
宋當時改乾坤此老存手中一把菊秋色滿丘園

相逢疎柳下賓主兩忘言處士乃無履江州初到門低  
頭入茅宇散髮對金罇長揖朱轡別狂歌向小園

即事

龍溪一片水何處是真源沈吟搔白首竚立向黃昏宿  
鳥爭投樹歸牛漸滿村少年誰氏子歌吹隔江繁

經故居

到溪田作圓環堵樹為門老憶先廬在貧知草座溫三  
遷時已後二紀恨空存舊事無人話斜暉滿故園

容琴月生孫以詩來賀之

春意復西良孫枝茁更芳自堪為喜極誰肯笑詩狂竹  
杖還渠撰金杯與客長簪花垂白髮疊映綠衣香

贈何廷桂罷館歸

科頭行百里笠影落煙霞四十親舒卷尋常過酒家兒  
童非講席鉛槧此歸槎共待春芳發來看舊種花

贈謝德明有事赴廣還

畢嫁吾何有勞君作犬商釵裙是荆布歲月勝資粧月

動江濤白山衰木葉黃無錢入城府來往但輕舫

月落五仙城天空一雁鳴離愁動江色歸纜解鐘聲驚  
應船謳起溪尋酒慢行經過不買醉貪嗅早梅馨

有傳羅一峯觀化

悲風何處起散作斷腸聲乘彼白雲去湖西問死生四  
海方懸仰一峯何可傾平生不下淚今日盡沾纓

問訊南川子

東莞林光也

金牛有是非憂為妻子地淚濕故

人衣歲晚流言惡天涯信使稀西風吹落葉故故傍愁

飛

四月

四月陰晴裏山花落漸稀雨聲寒月桂日色暖醅釀病  
起初持酒春歸尚掩扉午風吹蛺蝶低趨乳禽飛  
生意日無涯乾坤自不知受風荷柄曲擎雨栢枝垂靜  
坐觀羣妙聊行覓小詩臨階愛新竹抽作碧參差

風雨夜有數十客共飯達旦不寐

老覺生涯少貧添食指繁雨中誰舉火夜半客推門室



暗承塵濕階翻墜瓦喧平明不曾睡負鍾理花根

聞方伯彭公上薦剡

當時尊孔孟用世必詩書夫我何為者先生非過歟長  
歌扶晚醉短髮向秋疎坐惜籬前水垂竿試釣魚  
骨相合長貧巖棲累十春忽傳邦伯疏見笑北山神伎  
倆只餘子行藏獨老親古來稱冰鑑誰是鑑中人

初秋夜

四時相代謝已度一日秋風吹露下葉月照水邊樓堯

舜今當御巢由竟媚幽山靈邀夢去昨夜又羅浮  
自我不出戶歲星今十週丹砂求未遂綠鬢去難留時  
節來將晚山河值早秋西風捲雨去星月滿池流

秋夢

山斗英魂在江湖秋夢深還將百年淚滴破一峯心絮  
酒熏天地金牛恨古今龍泉不挂墓吾欲殉吾琴  
南海五千里不來莊定山何由到江北此會非人間短  
短目相屬悠悠心自閒莫言但是夢好夢亦云慳

夜來何所夢洗耳白龍池秋月下相照天風高自吹永  
持一瓢水細嚼萬年枝山鬼向我拜先生是希夷

答惠州鄭別駕惠葛布

惠我一疋葛縫衣笑不奢賦詩酬別駕愛酒典隣家獨  
酌秋風裏浩歌山月斜醉魂不覺遠卧探惠陽花

世澤

世澤由來遠何年播廣東吾廬依外海分派自南雄家  
剩為裘業山餘偃斧封千秋文物類并與劫灰空

世澤由來遠時當阨難中長鬚躬隴畝赤腳話兒童骨  
肉危相保干戈晚益窮存亡一絲髮端為謝蒼穹

世澤由來遠中更幾替隆市廛懷直道夷險信陰功地  
接華山隱家嚴涑水翁百年還舊物報事亦無窮

世澤由來遠誰興啓迪功今無天顏子古有聖重瞳想  
像千年下淒涼百感中痴兒何足了徒只愧家風

江門墟

十步一茅椽非村非市廛行人思店飯過鳥避墟煙日

漾紅雲島魚翻黃葉川誰為問津者莫上越墟船

中秋期友賞月遣蒼頭致餽以詩述之

籠鵝并榼酒食有一金攜寂寂慙吾子依依向隔溪開  
筵面華月出戶望青藜若負今宵醉何不西山棲

即席賦

夕風生微涼池塘散月光呼兒看酒具待客飲江鄉月  
對歌筵徙風拖舞袖長人生行樂耳歸棹夜相將

盆池栽蓮至秋始花

栽種已後時花發秋將遲雖無女伴采亦有山蜂知葉  
稀因地力香遠是天資安得三閭手臨軒賦楚詞

秋露開炎萼非時不遣誇盆中玉井水溪上春陵家酒

醒涼風發詩成缺月斜願為若耶叟種水作生涯

開花恨不早花落却生愁白露能消物紅蓮不耐秋頻  
來痴小女對此淚長流不識榮枯理哀樂空相仇

此夕不能寐此樂殊無央下堂步明月月印花自長涓  
涓花間露夜滴池水香但惜花月好那知風露傷

圭峯閣

勝處不在遠杪秋何處尋步崖碧澗落眠石青松陰地  
少滄溟入山高雁驚沈此時閒佇望誰識倚闌心

庚子元旦

風日佳元日乾坤自此春蒸空雲氣濕照水柳芽新笑  
語聊供客杯盤少對人能寬垂老意花鳥不無神

春興

野晴花簇白山暖樹更青卯酒醉欲睡午風吹又醒閒

拈曲江句勝讀法華經自在山牕下跏趺趣已冥

晨起

羣雀曉啾啾閉門春事幽下床花到眼招手鶴朝頭永  
日還書卷衰年但酒甌醉來江柳下笑引子陵鉤

早起

推枕起新晴披衣向小明坐忘新病減夢少夙心清軋  
軋開隣戶瑟瑟殺縣更跼奴呼具盥旋起遶花行

春懷次韻陸放翁



江發溶溶綠山開面面青春風何氣力吹動綵雲亭時  
物歸春雨交游散曉星十年江海夢誰道不曾醒

清明日往孔家山墓

舊隱經都會佳城入孔家春雲低拂馬山路曲縈蛇只  
隔飄香處猶疑壞圃花九原無曉夜誰管夕陽斜

春興追次後山韻

萬物各得性天開一歲春風柔翻弱羽波暖躍纖鱗  
柳初成趣芳芹亦賞新川雲將岳雨何者不供人

雨坐

風雨坐前楹  
關關雙鳥鳴  
正當落花處  
更作送春聲  
大化歸無極  
斯人樂久生  
不知川上水  
東逝幾時停

弔陳毅卿墓

微風松下起  
落日照蜻蜓  
絮酒知吾輩  
春山憶毅卿  
由來都大夢  
終寄一浮萍  
極目蒼岑外  
波濤滿地生

蓬萊山祭伍光墓

道骨成仙蛻  
名山是閭丘  
雲中騎款段  
天上叫軻輅  
人

世黃梁熟吾儕白髮秋仍留一杯酒何處酹金牛

樹穴蘭

樹穴疑生理想花開不記年靈根那藉土芳氣值薰天瘦  
比食芝老清於辟穀仙平生誰得見雲嶠但蒼然

大托千尋樹真堪托此生春風卷騷怨秋月照琴聲南  
極峯連起東溟水一橫所棲非近地持贈若為情

家兄攜秉常看山予病不能往

行色千崖裏風光三月中山家愁酒少造物愛詩工好

金少卿集卷七  
鳥簣為韻新花錦作叢吾能騎瘦馬不惜遠追從

題龜山小隱賀聶清碧新居

瀕海地三畝連雲廈數間龜山愛清碧清碧愛龜山笠  
屐誰同往江湖我自閒芙蓉小溪水曾此照衰顏

山下別業

豕脚有濡需乾坤胡適隨看雲因坐久抱甕得歸遲家  
累無多口生涯但一陂歸哉五湖樂吾未羨鴟夷

弄孫

畫棟三重簷  
瞳曉雀穿一兒卧  
我膝一兒坐  
奴肩風日秋  
逾美詩書老  
未傳二雛當  
慰我心賞獨悠然

戲贈都老

蔡坑黃野舟  
獨坐小園幽  
被命為都老  
傾心向縣侯  
萬家春且至  
一紀俗全偷  
莫倚無言化  
須君九借籌

韋夫人挽

兩山先生配  
謝之母也

人生如朝露  
死亦同蛻蟬  
有子能如謝  
夫人可以仙  
春臺花灼灼  
秋浦月娟娟  
喚醒何州夢  
歸來淚迸泉

次韻何宗濂

灑落儀曹句遺名得自求如何行不顧膠向漆中投無  
事由來得多言大抵浮結趺檣木下即此是良謀

至陳冕家

遠樹晴堪數孤雲暝欲遮自憐江海迹能到友生家落  
日明江色輕風動麥花相看吾鬢白不必問年華

金洲石

在江中

舟楫公餘日金洲不少留中流幾丈石明月五湖秋目

擊金山寺春來白鷺洲西風從此去幾日到羅浮

弔李九淵

水竹更新主風花失故權夜臺無起日春草自流年萬  
有終歸盡千秋不必傳倒巾此相對只有玉臺山

古柳寄周京

西來何處水千里不平流入海魚龍喜懷山草木愁雨  
邊明落日石角上孤舟寄語周京道勞生不自由

德慶州舟中呈伍南山

江漲麻墟雨天低德慶城正當擊楫處空有結趺情入  
夏尋雙井沿流到七星同行鄒道士勸我學長生

德慶峽是年大水舟行不由故道

客路一千里羊腸八百盤時時行樹杪往往異人間竹  
纜牽江暝絺衣入峽寒倚門應盡日誰與報平安

和尚石

舟楫行天上斜暉卷浪花迴流忽吞吐鳴櫓極嘔啞便  
可通星漢還堪著釣槎雲根僧一個疑我不袈裟



南歸寄鄉舊

家在桃源裏龍溪是假名  
蕉衫溪女窄木屐市郎輕  
生酒鱖魚膾邊鑪蜺子羹  
行窩堪處處只少邵先生

居士舊茅齋蕭然倚玉臺  
獨尋寺裏去每到日西回  
魚躍水萍破風推巖戶開  
小橋殘板在長訝有人來

省事除煩惱端居養靜虛  
栽花終恨少飲酒不留餘  
山徑兒吹笛村田婦把鋤  
殷勤謝閭里勝事莫相疎

碧草東西埭黃鸝遠近山  
巖春花氣足簷日鳥聲閒  
文

字虛堆几園林不設關一條煙際路朝往暮來還

江邊逢野叟入手問官名立崔黃牛近銜魚白鷺腥西  
田餘故宅北崦多新塋駐馬斜陽外淒然感廢興

山童呼犬出狂走猿諸孫乳鴨爭嬉水寒牛不出村墟  
煙浮樹杪田水到桑根隣叟忻相遇笑談忘日曛

自愛愚公谷誰過野老家時依當戶竹閒數上墻花鳥  
立溪槎靜牛爭崦路斜懷中嬌小女學語解呼爺

紫水團沙北黃雲古剎東樓吞滄海日慢卷玉臺風物

色求鍾鼎丹砂訪葛洪芙蓉開十丈天際白龍宮

出處有分付將非人所能君看飛鳥輩誰不顧高騰放  
意三杯酒留情半夜燈韋丹非俗吏靈澈自高僧

沙渠風日美弄水愛羣兒花落鶯猶語春歸蝶未知惜  
芳心未已高咏社公祠四序每如此獨憂無乃癡

### 春興

野鳥飛窓靜春蘿補屋穿時時嚙花氣翳翳傍林園山  
鳥日暮至長鳴芳樹煙喚醒陶令醉驚覺華山眠

社西村

孤村比屋靜疎竹小塘幽何處還三徑如公也一丘晚  
田行布狗春草散鞦韆汲澗誰家女金櫻插滿頭

結茅依里社村以社西名客至惟談稼年衰不入城隣  
雞上樹宿水鶴傍人鳴向晚尋牛去前岡笛又轟

君家里社西我家里社東平分社公雨不隔馬牛風瓜  
地妻能種衣巾俗與同雲邊采芝逕高盡玉臺峯

社主對諸阡居廬散百烟共來鄉社會同樂帝堯年折

花潮沒屐吹笛月隨船偶尋社西去又賦社西篇

社西逢酒伴埭北有花枝詎識愚公意聊同牧豎嬉  
圍碁松崦久度馬板橋遲袖有歲蕤草還家不告飢

卜築真何意施為但自由鄉音還社阮家業且陂頭野  
老眠看客山童坐飲牛無生知樂否更為問骷髏

寄馬默齋

山陰元有興畫舫在須登閑閣思君子開門見老僧  
騎驢山路隱挂席海波騰揣度安危事如公恐未能

倒載輕駢駕徒行謝衆扶無錢欺老杜失策問長鬚山  
雨醪醕病林風枳殼疎待君君不至春盡又何如

月坐

林深月到遲愛月坐成癡平生不戚戚衰老尤嬉嬉曾  
西卑管仲孟子述宣尼何事由求輩區區欲有為

懷古

千里拜林宗行藏未始同諸賢皆好義夫子獨時中東  
漢非劉氏西山是閭風堂堂四百載載籍為誰空

讀西涯李學士撰趙員外滄江別墅記

江空秋月清月出秋江明水月自相得乾坤誰與爭作  
亭趙員外屬記李先生何時理烟艇載酒下南京

思親堂

父子自天性誰能詠蓼莪聲容想如在風木悲奈何草  
露滴秋隴庭烏號夜柯思親兩眼淚萬古注江河

送鄭巡檢休官還莆

卑棲一枝足高舉入雲層大鵬非斥鷃斥鷃非大鵬卑

高各有適小大不相能歸去木蘭溪溪魚美可罾

懷古

皇皇復皇皇開闢到陶唐遲日江山麗春風花草香閭閻盡孝弟簡冊無禎祥乾坤十二會已午任中央

寄容一之

直以傭為業何妨睡作魔吟詩終日少飲酒一生多坐  
久頭鳴籟行遲脚有鵝林居三十載一室小維摩

萬松草屋



南山愛夫子夫子愛南山孤鶴去千載萬松棲半間無  
愁催白髮有藥駐朱顏夜半風雷作龍來問大還  
畏途千百轉回首見諸山若個幽求子結茅松樹間希  
夷歸華頂黃綺在商顏分我青精飯從君亦不還

寄太虛上人

太虛石洞居孤絕少人依遠客攜琴至逢師乞食歸一  
甯青草上四面白雲飛盡日無言說巖花落滿衣

定山聊作主石洞更無隣勸我無多事如公是一人朝

聞履虎尾莫見批龍鱗莫笑楊朱小楊朱解愛身

九日寄丁明府

病裏登高意村邊社樹蒼有歡開酒禁無力控詩狂老  
鬢花簪醜秋襟水照涼如何丁明府不肯共重陽

菊節後五日丁明府彥誠攜酒來飲白沙社賦補  
會

秋色上籬尖天高霜氣嚴對花無阿堵笑我似陶潛節  
去杯盤在公來更隱兼江門賦補會勝話無窮年

此日還供酒人情蓋亦難暫隨明府醉斷送菊花殘極  
浦明秋日臨流弄晚竿遙憐張閨幕相憶在長安  
百里非無地東籬不借人因君九日愛傾此一杯春菊  
謝人間世官閒酒處身想無厭花意投轄暮江濱

對菊

種菊不盈區揮金每顧餘古今閒計較俄頃失歡娛西  
廩高堆粟東樓賸貯書路旁楊柳樹顛顚不成疎

秋晚

皎皎月又缺鮮鮮菊可收汀雲迷島嶼山雨落扶留市  
有屠牛杭江連邏吏舟恐無賒酒處垂白對清秋

陳方伯恥庵挽詩

乾坤如此老沒齒向斯文公自滄溟水人無敵鯨君衣  
冠全素履江海挹清芬病起須持酒青山欲到墳  
中年倦俯仰上疏乞山林黽勉南州牧遲回北極心民  
蒙三日雨世病一鉤金殄瘁聲悲處龍蛇歲值今

苦熱

揮汗書難繼清心雨未來手提弱絲去風撼社門開指  
點封君句摩挲土棟苔松根吾欲卧返照又相催  
晚涼慰我渴秋暑著人煩拄杖緣溪足看湖到柳根哦  
詩衰骨痛開卷病眸昏六月飛雲冷相思只斷魂

晚步

水國秋先至江村晚更幽泥筌收郭索山網落鉤輶涼  
入社門樹陰連渡口舟獨憐經略地吾得放歌遊

居常懶出戶肯到社西頭海國諸峯暝乾坤六月秋微

涼生浦樹返照下西樓今夕蒲團上前山更卧遊

崔清獻公裔孫潛示遺芳卷復許示遺像予既書  
紀夢之作於其還也贈之詩

積雨階苔上經旬斷履痕誰為門下客公是菊坡孫澤  
與流風遠名因避相尊丹青遺像在何日照江門

太夫人晚歸攜諸孫候於貞節橋下

寒花明隔塢暝色欲歸潮未愁山路黑莫放板車搖  
耄耄供人事兒孫候此橋殷勤望四崦風急暮雲飄

延緣看落日伊軋到溪西  
路依岡轉垂蘿拂蓋低  
喜從中道見痴效小兒啼  
報賜心何極乾坤聖壽齊

枕上偶成

翰苑無官府蒲團了歲年  
巖雲交樹白水月印沙圓  
懶甚陶元亮閒於魏仲先  
吾曹生分薄於福敢求全

梅村詩次韻黎雪青

梅村梅發早已過賞花期  
玄酒初無味名家豈在詩  
井寒人汲少川暝鳥飛卑  
高枕滄溟者神仙定不疑

次韻秋興感事錄寄東所

醉眠山影裏恨不與君同松下泉來冷雞鳴日過中就  
床梳白髮開戶納清風起視滄溟暮孤鴻沒遠空

秋露落芙蓉河山日不同物情詩卷裏天道雨聲中朝  
出馬愁坂暮行船逆風欲投雲谷隱鞭鶴上層空

崑崙一池水色與銀河同問子為誰氏從師向此中短  
檠非世業破笠是家風回首唐虞際浮雲點太空

首陽非立異柳下不妨同歲月黑甜外乾坤軟飽中腐



儒甘糲食烈士死長風今古誰能計賢愚併一空

得林子逢書感平湖事賦此次前韻

平湖千里水沅濯與誰同咄咄諸魔裏冥冥一夢中支  
離深歲月感慨極秋風點檢希顏處吾瓢合屢空  
同人未為失子不善為同宦况浮雲外生涯大驚中孤  
篙撐急水弱羽試衝風佛者空諸有吾儒亦有空

與梁文冠

鉛槧誰分付聞君有義方紙田須樂墾畫果豈堪嘗得

雨花蹊潤隨風鳥韻長公來詩不少排日兩三章

與客

客訪貧家少連旬幸作東笙簧都萬籟俎豆亦千峯冠  
帶迎人懶情懷傍酒濃白頭君莫笑醉袖舞春風

四月廿七日五鼓起索衣往來房戶間失脚仆地  
傷面咎在不謹然亦衰年久病氣弱無力之驗也  
為詩以自悼

脛骨衰無力顛危剛莫支少年非一蹶今日獨多悲形

模甘老醜面目對人疑呼兒教滌血不忍報慈闈

風捲芭蕉雨南窓夜擁衾人當懲樂正我已媿曾參一  
一觀天命時時動此心林間子規鳥那更助悲吟

寄張進士廷實

是詩難入俗正坐不雕鐫水滿魚爭躍花深蝶喜穿日  
高雲卧處春在鳥啼邊不及陳無已能無賞自然

秋中寄興同前感事韻錄寄東所兼呈雲谷老隱

一笑

山人無外事白首稚兒同弄水溪堂背爭棋紙局中盆  
池秋見月竹院夜呼風觸事成唐句狂歌向碧空

偕伍伯饒楊伯順甥舅順德李子長遊李村山

遊走意何窮天樞日夜東青山都老脚破笠又春風  
草分遙碧巖花墜小紅乾坤渾欲到何處問壺公

晝睡偶成寄玉臺文定上人

老脚春還短名山夢每登玉臺天上寺文定意中僧得  
法休藏鉢傳心信有燈道人北窓下一枕一曹騰

春日書事

開年今日雨疎柳小塘春紫燕將歸社黃鸝欲喚人未  
明事南畝選日聘西賓元亮朝朝醉江村白酒新

春日江村

時候花先覺陰晴鳥自知登山嫌避客得句樂呼兒蔓  
草披香徑垂楊覆淺漪美人期未至江月幾盈虧

草帶籬腰綠花簪石頂紅林園開畫景鶯燕語春風山  
靄霏霏合江流渺渺東獨來橋畔路高柱過睂筇

驛吏送酒

市榼通郵吏三杯洗侍兒十分春意思一副酒肝脾江  
嶺長看畫風花不盡詩混然天地內公是醉鄉誰

春日醉中言懷

山林亦朝市朝市亦山林兩鬢白於舊三杯狂到今子  
雲休擬賦元亮已忘琴南山千丈石可以明我心  
古人不可見空見古人心春風開我殘流水到誰琴無  
說可傳後何才敢議今玉臺花信少扶杖更西林

與客談詩

風雅餘三百唐音僅幾家夢猶將影說癢莫隔靴爬豈  
是安排定胡為孟浪誇超然不到處應是用心差

雨中李世卿往還

助談風滿席伴宿月流衾貧賤交游冷江山腳跡深惠  
連何處夢孟母此時心稍歇松齋雨還來辨繡針

得林憲副待用書有懷故友張兼素

蹇蹇張兼素從君致匪躬天來今日定書展故人封賈

傳生還慟湘纍死亦忠平生兩行淚萬里寄秋風

寄容貫圭峯

西風扶策上病骨快新涼乞米分僧飯聞香過梵堂閉  
門秋竹靜語鳥暮鐘藏浩浩蒲團上還同在醉鄉

落日荒臺上疎松古塔邊身休論出世趣欲到無絃峯  
閣初生月渠通自到泉西菴憑借問許住過殘年

江村晚望寄世卿圭峯

一望一延緣諸山進目前鄉邦無一老知舊半重泉黃



葉寺旁下白雲池上連無窮幽澗水日夜注東川

贈黃進士廷章還京

錦衣在親旁飲酒日百觴樂處嫌春短離心向夜長青  
雲冠蓋起黃甲姓名香五色持文綫千年補舜裳

白雀羣飛益高

取勢翩翩上江空暮雨餘情輕鳩並婦聲細雁呼奴白  
雪灑孤嶂青天開一圖安能隨蚱蜢跳躑在泥塗

得林別駕書云去秋九月嘗夢予於廣信舟中兼

示道路所聞

潦倒年斯邁  
芳菲日自遲  
忽聞天上夢  
又落世間疑  
扛鼎須憑力  
無才敢與知  
涪翁亦秋思  
漫寄頴濱詩

重過大忠祠

宋有中流柱  
三人吾所欽  
青山遺此廟  
終古厭人心  
月到厓門白  
神遊海霧深  
興亡誰復道  
猿鳥莫哀吟

春陰偶作寄定山

浩浩川流疾  
冥冥嶺樹陰  
共憐春錯莫  
更覺老侵尋  
宿

雨衰花氣朝陽絕鳥吟誰能盡天道俛仰此懷深

次韻寄廷實

吾猶堪起倒吾肯謝親賓在世寧須此如公故可人百  
年應得見一面始能親獨向湘江去無忘越嶺春  
無才傭作吏有酒喜留賓老更耽高卧時還近俗人鐘  
鳴山寺遠月出土床親何處期吾子笙歌玉洞春

築室

垂老無筋力寧非板築人居常只謾過即事始知貧海

國秋風早山房夜氣新癡兒解了事吾坐養吾真  
一室無多事貧家每作難從來無厚積況復不能慳貸  
粟千知友營材入遠山三間開土閣聊得奉慈顏

送景易赴秋試

未達窮通理難忘得失心安能謝朝市且莫厭山林烹  
鼎須兼味吹竽當好音文章無定價敝帚不論金

圖新書舍懷世卿時別白沙半月

月上齋垣白疎梅共主賓偶來對月飲不見如花人已

覺書難至常疑夢與親  
海山猶在眼何處却逢春

龍眼

龍眼何年種嗟嗟舊主人  
卑柯今蔽日腐骨已成塵  
春雨沾花足秋蟲食實頻  
流形非木石鬢脚半搔銀

始聞秋風作

西風中夜起天地始肅清  
白雁霜前意玄蟬露下聲  
幽人亦何事版築初經營  
何時登此閣坐望羅浮征

題容氏輓冊

中秋悲蹟掃秋思  
依依此夜月還照  
何年鶴始歸  
啼新宰木巷納舊蓑衣  
大塊終同爾誰能駐落暉

梅花

山竹深深逕梅花  
淺淺塘清冷  
朝弄影芬馥  
夜浮香瘦骨交撐  
月橫梢直過牆  
啄英終飽德  
靈鳳或來翔

探梅非探梅  
梅花滿玉臺  
北風吹盡日  
疎雪點荒苔  
色得乾坤正  
精成造化胎  
無人知老子  
剛坐一牛來

何處尋梅好  
羅浮海上春  
樹環鐵橋盡  
地與葛仙隣  
煉

藥香生鼎扳崖影落身西湖千頃水未洗往來塵  
彼美枝頭雪微韜嶺上雲低迷明月寺掩映葛洪墳北  
海罇能倒西湖地索分幽香偷未得衫袖細氤氲  
手種梅千樹山寒半欲花歲闌知此意溪上問誰家素  
豔明爭雪青蘿倒縮蛇還須邵康節來駕白牛車

逐客

笛聲且莫哀逐客過江隈還到此邊去盡因何事來著  
書多在篋遇酒輒銜杯莫言生意盡寒雨濕枯苔

得張主事廷實書

十口雖無累三年不易更春雷轟令問枯木嚼官情長  
夜鄉心切何時會計成登高望東海到眼是蓬瀛

新涼欺老臂索被過殘更月到思君處書通在客情有  
家寧免累作吏轉難成日踏皮鞋破思量舊閭瀛

三口丘園舊離羣跡半更幾時重見面中夜獨馳情眠  
食今何似頭顱尚可成定山名教頂賀老却登瀛

持燭圭峯寺宵談僕屢更一為方外友都沒世間情面



壁僧猶在栽蓮社未成孤舟破危浪載月下東瀛

次韻寄潘時用

文章豪自寄丘壑靜還更久病依人世長貧慙婦情

婦辰

岳氏嘗止辰赴秋試

人為知己惜天與後生成更約齊州外從吾

泛大瀛

久雨

樹隱雲深黑籬崩水亂流凌風快燕子上壁定蝸牛老  
更憐兒病人多為草憂朝朝稽叔夜誰辦不梳頭

用韻寄姜進士仁夫

書愛八分小來書喻率更雲霄初接武江海尚留情世  
事非難料人才怕小成諸賢須汲汲吾老獨觀瀛

用韻寄林緝熙平湖

秋懷耿不寐更靜復聞更水向漫漫注心含種種情士  
應強到底官豈怠將成舊業羅浮外東南望隔瀛

用韻效寒山

貧賤恥為拙富榮常好更高論古今事中懷名利情堂

堂無復見小小或能成浪說神仙在從來不住瀛

四郊多竊盜村裏夜支更為語長官道能無患盜情家  
家愁日暮處處望秋成飢飈飽蒼粟苦海變蓬瀛

贈劉程鄉別

肅菴今又別酒醒望圭峯秋色此溪樹暝烟何處鐘功  
名悲夢蝶文字恥雕蟲故里荒墳在歸來拜一峯

病疥用後山韻寫懷

癢極肌難忍爬深血有稜老親令就枕小婢問留燈屋

漏頻推瓦床搖屢束藤同袍誰問疾端愧玉臺僧

呻吟不盡痛夕枕傍慈幃安得身長健朝朝見綠衣無  
膚臂奄赤乍腫臂疑肥睡過西廊月寒空淡不輝

缺月生殘夜微風引洞簫心閒髮少白人老病難消出  
戶行看月移舟釣落潮酒錢不拄杖著處解奴腰

病枕愁更永籠燈對夜長千年無鮑叔一懶有柴桑兒  
請栽瓜地妻評作麴方花時呼酒伴酩酊出扶牆

贈黎蕭二生別

白髮孤燈坐青春二妙來若無天地量爭得聖胚胎至  
樂終難說真知不著猜濛濛烟雨裏歸思若為裁

野坐

團蓋青松午重裯綠草春野晴鶯得意花盛蝶傷神斷  
靄生西塢殘潮下暝津竹根酣共卧不覺解沾身

梅花

世傳詠梅句天下共稱奇花有無言妙人間都未知正  
嗟同賞絕又過半開時安得邵康節為我問庖羲

風月交游淡江山几席閒夜深花睡去時有夢來還引  
步尋香易無心弄影難乾坤留此妙何處覓孤山

謝客

客舫初辭岸主翁仍在床十年今轉數一飯故難償竹  
杪風生汗天邊雨送涼所思黃叔度歲晚得同堂

漾漾湖侵岸蕭蕭風引旗問兒打鼓處是客發船時鬻  
屨時將暮迎門俗久衰祇應巢許輩掩口笑人癡

寒雨中作

有期久不至旦旦問童奴  
雨過荆扉濕風回樹葉疎  
興移剡溪舫詩在灞橋驢  
風韻今誰繼千年勝事虛

喜梁文冠至

駐槩梅村夜風光勝早春  
直知花是路不覺月隨身  
草木皆知舊江湖多賤貧  
短蓑來往數等是最閒人

雨中栽竹

心被清虛引非關索竹看  
檐前纔數個淇上已千竿  
微雨土初覆北風天正寒  
昆丘有孤鳳何處咏琅玕

楚雲臺呈世卿

三杯拈鐵篴見月上瑤臺初弄山石裂再轟仙鶴來夜  
闌試靜聽曲罷仍遲回何必楊州去前村多美醅

行窩還幾處雲水且吾臺雨脚風吹斷潮頭月湧來野  
橋牽木渡沙迺逐牛回亦有採樵者放歌行負醅

有月嚴光瀨無金郭隗臺悠悠百年內又見一人來水  
檻秋逾好山雲暝欲回相逢各心醉一語浹春醅

爽氣通秋服溪流靜晚臺高樓多自愜真賞復誰來對



月詩方妙看山夢始回市沽堪便醉况乃是家醅

寄吳明府同世卿遊玉臺

主峯雨初霽策馬向松關流泉忽滿澗白雲長在山  
棄置千般事來投半日間上方禪榻靜坐到暮鐘還

生日答吳明府獻臣

生日何人記南枝報長官酒香同客醉花少避人看  
後甲惟元祀浮生又五寒凭軒一長嘯風日滿江山

尋梅飲李鴻宅用服周韻

今晨風日佳策杖去尋梅獨樹山中老危枝石上開時  
看殘臘盡人望早春來誰解忘情得神功付此杯

贈世卿別

客路經南岳湘帆背岳開江湖閒老夢歲月是君來相  
見兒童喜別離琴瑟哀惟應楚雲外更起望仙臺

豈無千日酒花下與君同客思朝臨水歸旗夜引風一

槎當浦口

謂莊  
定山

一枕在遼東

謂賀  
克恭

何事今為別藤蓑還

贈公

世卿乞予  
藤蓑贈之

贈世卿遊山

萬丈崑崙頂冥棲憶老闕君看白龍水何似黃公山有  
酒終日醉無官到處閒南風乃何意又送楚舟還

朝來生紫氣此地一函關帽頂花沾雨雲中人下山相  
逢欲大笑不語是真閒晚向東亭醉猶能騎馬還

世卿將歸

會有還鄉意深慙不自量毋留兒作伴妻為客求漿臺  
榜明朝旭松堂閉夜涼延緣過殘夏滿意泛瀟湘

與君雲水別何夢得商量合是真調鼎能忘老賣漿還  
山非早計舉棹是秋涼有路通衡岳無詩弔楚湘

贈饒鑑

君又去東津東津月送人周游千里道細問百年身野  
色淡將暝江桃疑是春丹青如可贈畫我小崑崙

梅花

草木自有性湖山更乞靈冰霜仙骨瘦桃李世情腥惹  
袖香全別和羹子未青未須攜鐵笛吹月上湖亭

喜何竹窓重過白沙話舊贈之

此君為別久不逐衆芳彫白葛身已老青雲卽獨超春  
風吹細浪落日泛輕橈楚雲有高樹未肯挂公瓢  
憶年四十許公弟立如山行止相料理漁樵共往還餘  
情空耿耿秋鬢各班斑不是公憐我清顏誰更攀

聞林緝熙初歸自平湖寄之

短世淵明醉長愁子美謔高情誰復爾久別公如何淡  
月初出浦好風來颺蓑買田滄海上耕亦不須多

張地曹寄林縣博用韻答之

無心雲自在得意鳥同譌白骨可人醉

杜詩古人白骨生青苔如何不

飲令

心哀蒼生如命何漁樵真有道烟水別傳蓑想見滄溟

外東南月更多

安得李太白樽前同爾哥自從識象罔未始離無何草  
長遊人路風鳴桂樹蓑東鄰古大嫂揜口笑何多

和子長民澤論詩寄興羅浮之作

飛雲千老夢拉伴騁遙臨揮手謝人世聞歌生我心今

年春又過何處洞還深相憶山樓暮依依向遠岑

再用韻示諸生

賢聖低回久千年想一臨希顏非樂道疑孟失求心逸  
駕行應速寒泉汲務深嘗聞根本學不盡泰山岑

贈李司訓別

江門雲水地不絕往來交已恨栽花晚寧辭抱甕澆月  
疑窓下枕風語樹頭瓢精舍明朝別何時還見招

再次寫懷

孤形將影住一臂與誰交矯矯志欲競棲棲習恐澆江山一得手風月盡歸瓢始覺逍遙外人間未易招

代簡畬府尊林先生慶老母生日

有母年齡暮逢辰喜懼深多儀安敢却揣分故難任錦段拈香拜仙醅洗觥斟獨慙非節孝未了百年心

秋坐碧玉樓

造次中秋過商量九日來詩將秋景淡菊共老人開時節陶潛醉江山宋玉哀平生滄海意不受白鷗猜



山中猶遠志小草已人間

近得東白先生書在山  
遠志出小草故及之

不是

無經濟誰能斷往還江魚肥入饌霜橘綠堆盤問我心  
何住紅藤拄杖端

碧玉架雲端朝朝倚玉看時情膏火裏世事奕棋間古  
榻多便靜華簪不博閒籬根散髮醉又對菊花斑

### 夢楊敷道定山事

夢語者為誰湖西舊見之聊寬野老意未了定山疑貧  
病吾猶是多愁俗豈知百年將滿日心亂不成詩

九日嘉會樓登高

引步下前除兒扶杖亦扶會於何處勝客有去年無天  
道常流轉園林又變疎暫留賞今日醉莫看茱萸

兼有吟詩病何妨著酒扶景逢佳處少句向覺時無醉  
去乾坤小醒來伴侶疎今朝嘉會會不盡看茱萸  
半酣壺矢折又減兩三扶九日江門有千年栗里無山  
形當晚瘦腳跡向秋疎問我登高去都忘菊與萸

溪邊菊一區溪竹兩相扶草木從吾好風霜殺此無閒

同元日醉浩笑一生疎試問干雲檜何如小泝莢

楚雲臺觀民澤所栽菊寄民澤用作九日韻時民

澤還五羊未返

當軒玉朶孤植竹翠莖扶香細風初動神清俗本無寒  
深溪井涸月出山瓢疎何處異鄉客永懷歌茱萸

野菊吟寄子長再次

野菊生何處尋香杖偶扶孤標猶訝絕佳色舊知無老  
弄真成獨秋來不作疎金樽誰九日引滿對茱萸

吳明府送菊次韻答之

黃菊有名花淵明無酒官酒多人自醉花好月同看老  
未厭人世天教共歲寒未應攜不去高步蓬萊山

答周潮州萬里

今代潮州守濂溪是一門乾坤吾道在歲月此心存行  
次天邊路書投海上村夕愁空竚望風雨暗高原

汪巡按見訪

嶺南經略地柱史不謀身料理安危事更張文武臣風

行先動草寒極正開春傾蓋江樓暮揮杯勸故人

寄題小圓岡書屋和民澤韻

四野雲飛盡圓岡一室清至虛元受道真隱或逃名有  
疏微言塞無為大業成一聲聞絕唱五岳看全輕

劉少叅見寄次韻奉答

西川一杯水為我浣詩塵身落滄溟遠心將翰墨親江  
樓初見客野徑別藏春十郡停車地千峯擊壤民

贈李世卿

楚客復歸楚青山此送君往來十年破精力半生分著  
意當時見留情異代聞若非真有見何處謝浮雲

三尺短春蓑山風吹薜蘿人材非管樂吾道本丘軻送  
老諸名岳全生一病窩相思憑寄語路打祝融過

落日蒼梧望清風發棹謳楚山正西上江水自東流作  
伴春攜酒談詩月滿舟洞庭看未透更上岳陽樓

題黃公釣臺

小小離人意羊裘却未工今人多白眼為我謝黃公弄

釣浮沈見登庖撥刺空浩歌泉石裏况有古人風

曉枕示湛雨龔曰高

二千六百丈脚底是飛雲悠悠四十年欲往念徒勤多  
謝紅藤子扶吾還數君鐵橋問何如見景勝於聞

萬年如一瞬莫問我浮生風雨將秋至山河載月明語  
簷幽鳥樂對竹小童清夜夜湘江夢與君何日行

再和曉枕寄廷實

仰見雙白鶴高飛入紫雲苟無脫俗意安用看山勤好

句能傳我幽期敢後君異時鐵橋詠莫遣世人聞  
萬往皆有復左車不復生西風今夜起朗月四山明天  
馬非常步鐵橋相伴清去去莫復顧衡山頂上行

曉枕再和

平生老黃石引望空白雲無人知感激為我盡殷勤何  
處尋吾契名山訪道君洞天三十六步步聲相聞  
外生即非死胡為樂久生去來大化內俗眼未分明我  
壽元無極君才亦太清五峯南斗上何日踏歌行



中秋

平樓時穩步身虛欲翩翩  
明日秋始半中天月最圓  
武昌書未返督府句堪傳  
衡岳那能去羅浮何處烟  
廣漠天自然浮雲任飄飄  
隨時有憂樂與物無方圓  
酒底月未咽水中神莫傳  
去年今夜艇吾欲破湘烟

彭司寇挽詞

男子固多奇如公更不疑  
經綸思昔日功業問當時  
鬼幸村巫小棋還國手知  
杜陵秋月下興盡八哀詩

侃侃亦閭閻行違榜要津鳥還江上暝人老世間春祿  
盡休言命愁多不為親武夷最高處東望一沾巾  
斗氣空遺劒牀燈不照琴春懷不自得老病忽相尋事  
往浮雲夢山餘宿草心平生孺子意絮酒一何深

題雲津書院太和劉氏

雲津杳何許試向卷中尋不覩六經教空餘百代心嵩  
陽思識面白鹿尚遺音家有鴛鴦譜何須更問針

春日寫懷

水際尋芳去花枝隔水新可憐今日望不是向來人紫  
袖垂垂下黃鸝樹樹春東風天外至南岳夢中身  
一觴復一曲不覺夕陽殘好景我只醉春風人未閒青  
紅今滿路風日未登山何如海中鳥鼓翅蓬萊間

贈周文都

君行無日矣奈此別離何道遠書難寄年衰病更多行  
行慎自愛浩浩不同波若見東山北微言共琢磨

贈黃希顏春試

北風雨如注是底別離時黃色眉端動青雲足下馳兜  
童酣世泰國士醒心期去去江流疾還君一贈詩

詩罷懷白洲先生

山東無近耗

白洲時為山東左方伯

海上立斜暉童子覓牛去漁

翁罷釣歸登舟人欲別

周文都赴會試將行

見月鳥還飛何限相

思意千峯獨掩扉

贈丁一桂

初月照甘棠千門一炷香南風催返棹西望欲沾裳有

廟旌遺愛無金歸故鄉未知忠定者先請問崇陽

奉寄筠巢翁

昔別筠巢叟如今是幾年華巔將望百碧玉屢添年寥  
寥千古下望望五峯前何日扶溪棹還來別老仙

鄧御史公輔寄新刻陳君舉論孟古義復以是詩  
兩漢非三代人才逐世低市朝多畫虎文字笑醯雞古  
義昭昭對終篇短短題不因歐六一爭得見昌黎

張綱

漢臣張御史何事便埋輪欲作千年計都忘一個身堂  
堂見意氣默默愧經綸却恨程明道丹青失寫真

吳節婦

江山逢此會真地作光輝路轉扶溪北山來越嶺西春  
光流聖澤明月照霜帷碧玉遙相賀雲中卧賦詩

汪海北訃至

西所今亡矣皇穹肯不仁眼中還見此天下豈無人海  
闊書頻至神交夢亦真人間秋半後回首一沾巾

誠至通金石乾坤正惜君懷沙人不見修古恨空聞歿  
世能千載還山但一墳海山今夜月空照水中雲  
望望白洋水滔滔碧玉流白頭聞有是傾蓋忽相投天  
柱峯常在神龍雲正浮悲歌掩圖畫淚落不能收  
英雄滿襟淚不灑兒女胸窮愁當盡夜浩歎起秋風幾  
點星初落千峯日未紅高樓慵引望興盡一宵中

示景易

長鯨千里鬣靈物一生奇化成端有日潛躍貴因詩感

應天終定早暮命難期信知抱甕是安事桔槔為

題丁長官祠

千山多雨後百姓苦飢時老病無人問低回只自知百  
感觀空盡扁舟適楚遲詩成遠莫寄分付長官祠

漫筆

行年七十二七十一非漁樵真有分語默各因時比  
恨四愁具方年伯玉衰未行元屬我天命更由誰

題筠巢卷



手把筠巢卷口詠筠巢詩白頭心折處碧玉夢醒時夢  
將人待遠心與此君期想見千林暮還同一鶴棲

寄張梧州克修

還家臣職盡攝守郡符新心同端溪水跡比峽山雲朝  
野無交牘桐江有釣綸時無張刺史脚板但空聞

贈黃化州歸莆田

有客來何處多年守化州白雲秋自好碧玉自相投日  
月催人去行藏悵此休武夷洗足罷回首望羅浮

枕上偶憶舊遊南海祠因懷故友林暕

子覺饒英氣攜書話此宮  
清祠無厲鬼大水有真龍  
過客窺諸葛論詩病長公  
往來三十載美惡併成空

卧遊上游庄

上游何處是試唱上游歌  
入澗花迷路出門雲滿蓑  
景勝開圖畫春香醉綺羅  
靜對南岡頂月明秋更多

次韻荅鄺筠巢

飄飄八紘外遠意竟誰分  
我抱三年病天生幾樣人  
十

年營一壙萬骨掩孤墳休休莫復論局促此乾坤

次韻遊上游黃雲山

繫艇黃雲下黃雲幾度歌登高雲壓帽度密雨沾蓑瀑  
澗宵鳴瑟山花晝擁羅野人攜茗榼路打鐵橋過

荅容北溪見訪

曲徑黃雲外青山一路深卷為乘興地人間何處尋白  
龍三畝水紫府萬回心錦囊挑不去千峯暮色深

中秋撥悶用舊韻

疎星圍碧玉秋氣正平分共持今夕酒又減去年人白  
髮來千丈青山忽數墳年光付流水萬物信乾坤  
晚有悲秋意秋來此夜分可憐清夜酌盡是白頭人紫  
蓋終攜病朱陵願卜墳誰能天地外別去覓乾坤

諱日

雖貧還講諱茲事俗之常時節難虛度杯盤祇自傷五  
鼎終難具千秋敢易忘痴兒雖未了清白永流芳

迎醫寄左明府

帆開春鳥起，篙響曉鴉連。  
日出千江水，風連一路烟。  
病苦魔難敵，情真事可憐。  
平生左明府，應惠濟生丸。

贈陸醫士左明府遣來

山雨睡初醒，門前報陸生。  
手持王氏藥，重是長官情。  
分付一杯茗，剛勞幾日程。  
小詩何足謝，聊以著佳名。

寄東所

病久惟聽命，詩成不浪傳。  
門前花十丈，玉井正開蓮。  
數椽剛到地，一棟且橫天。  
不亡吾道在，萬萬歲相連。

春日偶成

菊殘猶可對人老不須嗟水閣風低柳山籬雀啁花千  
門盡桃李十畝未桑麻大禹須治水顏回却卧家

競長家家柳齊開陣陣花春深添富貴人老舊烟霞歌  
枕黃鸝近開窓白鳥斜草玄無意緒呼酒對侯巴

白馬菴聯句

人生須此會何處問陰晴

白沙

動蕩乾坤氣調和鼎鼐

羹

懷玉

公來山閣雨天共主人情

定山

未了鵝湖興江

城又殺更

宗泐

寒風吹角短細雨打更長

白沙

天意留行李燈花喜對

床

懷玉

衣冠真率會尊俎太和湯

定山

何限春消息梅

花不斷香

宗泐

七言律詩

與友約遊仙井

仙井會容雙眼到病軀須著一筇扶  
春風有客來相問  
何日扁舟進所如  
世道難交終索寞  
幽居擬卜只虛無

憑君寄語山靈道欲傍啼猿借一區

馬貞卜築園中與容貫同處

何處有花堪結掾溪邊園裏樹相連一齋一榻同燈火  
江草江花自歲年元亮高樓須避俗巖青異骨合成仙  
東風兩岸黃鸝語我亦中流坐我船

自斗岡還至汾水江值暮

歸舟欲背南風發別磯初開落日斜社曲寄聲憑驥子  
是日景易  
有信促歸  
武陵回首惜桃花東遊西泛經旬日揮翰留



詩到幾家滿眼却愁歸路黑時從野老問江叉

弔崖

天王舟楫浮南海大將旌旗仆北風義重君臣終死節  
時來胡虜亦成功身為左社皆劉豫志復中原有謝公  
人衆勝天非一日西湖雲掩鄂王宮

子陵

誰將此筆點行藏真有乾坤日月光三尺羊裘幾銖兩  
千秋龍衮共低昂客星天上何須急老脚人間不浪長

留得先生在台輔不知東漢可陶唐

羊裘不返道終疑玉帛雖來事可知天下君臣光武召  
世間膾炙子陵碑故人不改狂奴態一事堪為百世師  
九鼎漢家從此重聽歌山谷老人詩

桐江秋水來天地照見千年老鳳還太史直書形迹外  
先生猶在是非間交情此去投當宁年事何勞列從班  
欲向東吳問遺老江湖容有此翁閒

先生如此亦天民高坐桐江一水濱却到陵夷排亂賊

方知名節是忠臣  
白鷗自去江湖遠  
黃紙何來道路頻  
往往見人東廡下  
傷心一代帝王真

讀張曲江撰徐聘君墓碣

杜陵烟艇曾來否  
相國銘章今在亡  
千古我能生感激  
一碑誰可借輝光  
江波自映蒲輪返  
原草還沾絮酒香  
事異鑿坏終遠去  
鴻冥天濶道之常

桓靈而下使人悲  
却憶陳蕃在郡時  
何處公車還欲召  
平生此榻竟奚裨  
事機成敗我當算  
天命去留人得知

萬古江山一回首風清月朗聘君祠

知心未問陳蕃輩欲起先生在帝桓自古山林輕祿位  
至今朋黨惜衣冠尋常笑語諸公撫七十支離一老看  
誰道開元張相國重磨碑碣寫心肝

一木能支大厦顛棲棲徒只喻當年身垂白髮西山裏  
光射青牛北斗邊信史只今文獻碣清風何日豫章傳  
狂歌亂耳不足獻依舊生芻置墓前

西山驛晚望

晚來花雨濕詩囊  
晚上郵亭望大荒  
南盡海旁諸郡淺  
西來天上一江長  
漁歌落日還孤艇  
樹隔啼鶯背短牆  
料理憑高非一事  
樽前誰與共平章

秋江漫興

能傾瓦觥深深酒  
不盡秋江短短篇  
閒弄孤舟移白日  
明開兩眼看青天  
鷗遷遠渚眠何處  
雲颭高風落此川  
野老隔波頻問訊  
可能無意向神仙

送羅養明還江右

長寄湖西夢裡身扁舟春早忽相尋乾坤自古悲難合  
伯仲而今契亦深草色正催公子醉花枝不稱老年心  
何須袖却鴛鴦手更向滄溟問我針

懶作人間賣卜仙紅渠浪裏枕書眠詩篇到老絕求世  
酒琰逢春不愛錢鷗鷺一羣清似雪江湖諸子遠如天  
扁舟忽報金牛信也得江花對惠連

村中即事

山風處處聞松花江市日日來魚蝦高田一弓走獵犬

灌水幾株叢老鴉正逢元宵市燈好亦有雜劇村鼓過  
野老西疇急春事長揖縣官歸縣衙

曉枕過金洲戲作

行人拍手笑天公十月江湖未朔風旭日上天纔半赤  
晴霞照水忽殷紅注目九江來艇急回頭三老著篙慵  
何須却是蒼梧道不道天公也笑儂

清明前三日有懷亡友伍光宇無子

先生英骨葬蓬萊幽思憑高不易裁荒歲無窮春易老

清明將近雨還來  
皇天自失包胥定  
泉壤誰興伯道哀  
尋樂齋前數株樹  
月明空有鶴飛回

禱雨呈縣主丁彥誠

峯頂為壇五土升  
皇穹端合享精誠  
雨聲先到玉臺寺  
雲氣初蒸綠護屏  
野老分錢須一虎  
病夫獻茗走諸生  
年豐我欲招神貺  
絕壁高鑄令尹名

奉陪趙提學崖山慈元殿弔古

信國諸臣近有碑  
一陵瀕海尚堪疑  
荒山野水無人到



落日輕風送我旗，天地幾回人變鬼。  
風波萬里母將兒，萋萋芳草慈元下。  
邂逅漁樵問舊時。

李德孚輓歌詞

此翁白髮已垂肩，猶借滄波十載眠。

德孚已五偕予自京師歸不復出至

是十年而卒

一舸載書同載酒，幾家留藥更留錢。  
山陽笛奏

西樵月

西樵南海山名，余曩與伍光宇同遊，後有西樵山感舊詩，即此山也。

薤露歌傳大

石篇

大石即德孚所居村名

誰道人生只如此，兩行衰淚落江烟。

別時已動東游興，別後還深永訣悲。  
夫子春秋能六十

故人涕淚不童兒身如南郭人間老家有文溪地下師  
修短未知人喜戚天涯孤影日淒其

題莊定山詩集

春風一曲有霓裳不落人間小錦囊今代名家誰李杜  
先生高枕自羲皇乾坤兀兀中流柱風月恢恢大雅堂  
莫道白沙無眼孔濯纓千頃破滄浪

浴日亭次東坡韻

殘月無光水拍天漁舟數點落前灣赤騰空洞昨宵日

翠展蒼茫何處山  
顧影未須悲鶴髮  
負暄可以獻龍顏  
誰能手抱陽和去  
散入千崖萬壑間

扶胥口書事借浴日亭韻

早春約我扶胥口  
今日進舟黃木灣  
使君已去漫留諾  
水國獨吟空見山  
老向烟波真得地  
晚來風日更開顏  
明朝去覓南川子  
與話平生水石間

宿攬山書屋

一片荷衣也蓋身  
閉窓眠者乃何人  
江山雨裏同歌嘯

今古人間幾屈伸長與白雲為洞主自我香樹作齋隣  
山中甲子無人記一度花開一度春

別攬山

羅浮山色眼中來老子心情不易裁高浪不驚南海舶  
白雲聊共攬山杯未知竹徑留人否那問天公著雨催  
主人更道秋來好收拾黃花待我回

餘興

何處秋聲入短琴江邊蕭瑟起楓林空歌白雪兒童笑

不負滄波老子心  
釣石摩挲雲氣暖  
睡沙展轉月痕深  
眼中昏嫁隨時了  
只有床頭鬻犬金

陳冕來遊白沙至仰船江遇石尤風舟覆

中流幾覆程夫子  
何況白沙門下人  
賢輩何曾負天道  
老夫正自怪江神  
仁義幾回驚濶論  
利名何處不通津  
祇應歸拜庭闈日  
棄置艱難不肯陳

羅一峯輓詞

今我何敢私一峯  
百年公論在兒童  
要知此老如君實

更恐前身是孔融青天白日人千古五典三綱疏一通  
天下何常乏知己我言剛與定山同

狀元文史少微星翰苑為官謾兩京既有光華爭日月  
那無描畫在丹青表章細事憑諸老悵望高風激後生  
千秋欲與蘇徐並湖水中央更一亭

芙蓉城下白驪還更見一峯何處山晚覺神仙真妄誕  
肯留精爽一追攀高才轉盼交游內元氣驚心宇宙間  
此日迸空為誰泣衰齡何意向人寰

杜阮看山

客賁卜  
居之地

曾於海上看羅浮，魂爽高飛未得收。  
一片好山還入眼，兩巡瘦馬更回頭。  
青浮竹杪岡連峙，紅浸花枝水曲流。  
君若卜居須卜此，澗邊黃髮是巢由。

數家種竹已成林，共有平生下築心。  
草木總偷春色早，雲霞偏傍晚山深。  
鶯聲早赴山靈約，松蓋先分地主陰。  
欲置一菴三級土，結趺高榻對南岑。

代簡答伍郡主為莆田林侍御求草書

閉門一病九十日小草大草生荒蕪山癯須愛老狂客  
府主正逢賢大夫藥裏君臣何處有墨池風雨坐來無  
秃管已馳林侍御如今雪繭不還莆

東亭奉別憲副陶公

父老連村擁畫航東亭西日引杯長舊是宰官今憲副  
後來新會古桐鄉指揮戎馬能千里表裏山河捍一方  
太史但收能吏傳昇平不必問耕桑

蔣宗誼以厥考樵林摘稿及其所著續宋論見寄



代簡奉答

江右詩書不乏賢君家父子盡堪傳  
樵林一摘幾千首  
宋論直窺三百年西漢文章遷史後  
東吳風月定山前  
乾坤隻眼知誰在不是楊雄不好玄

寄景星海上海上

妬花暝雨迷千里隔水殘紅度幾車  
夢破三更子規鳥  
香來一樹木犀花病夫老去頭如鶴  
稚子春來髮似鴉  
海曲傳詩意無盡更期何處問丹砂

次韻都憲朱公歸興

當日頭顱也未然相逢休問買山錢  
葛巾旋把陶潛酒烟水將歸范蠡船  
嶺表他年須領略桂陽秋月憶高眠  
大臣去就嫌疑絕還似嘉謨贊九天

命孫田

新開斥鹵走通川  
贖種烏鰲益稅錢  
士不居官終愛國  
孫當從祖是名田  
幸生天下承平日  
屢見人間大有年  
從此不須憂俯仰  
茹齋向暖抱孫眠

辛丑元旦戲筆

酒杯不與年顏老，詩思還隨物候新。  
分外不加毫末事，意中長滿十分春。  
樓樓竹几眠看客，處處桃符寫似人。  
除却東風花鳥句，更將何事答洪鈞。

與謝胖

柳市南頭望客舟，青山無語水東流。  
江花自對黃鸝晚，風雨偏催白髮秋。  
宇宙萬年開老眼，肝腸一縷入春愁。  
明朝日出波濤暖，依舊忘機對海鷗。

重贈張詡

風雨何人來款扉  
滄江烟艇疾於飛  
正將白首憐傾蓋  
不管春泥得上衣  
詩句與君爭出手  
酒杯中我自忘機  
傷心萬里滄溟水  
又逐長風破浪歸

醪醕將開值雨

相看無語只沈吟  
蓓蕾枝頭已簇金  
山雨不來昏晝景  
東君容有妬春心  
較量花品終何益  
茫昧天機亦自深  
明日陰晴還未定  
一尊何急對花斟

答梅繡衣見訪

一春烟雨暗荆扉  
繫馬憐君共落暉  
酒琰香風吹月桂  
硯池清露滴醪醅  
水中郭索嗔皆是  
屋上慈烏愛亦非  
天道不移人自異  
紅塵飛上釣魚磯

陳庸被盜張詡有詩唁之因次其韻

三尺龍泉八尺身  
書生膽氣欲驚人  
亦遣偷兒知我輩  
還將直道是斯民  
風連蜀鬼東方曉  
雨洗茶蘼昨夜春  
白舫望君心若渴  
清川照我髮如銀

曉枕

天時人事莽何窮睡破山窓正惱公  
幾點木犀三月雨一聲蜀魄五更風  
青春有限年年老白髮無私個個同  
莫共老人論甲子閭閻稚子亦成翁

詠鶴

孤山赤壁兩茫茫疎柳江邊一草堂  
塵世多黃髮老仙禽真對縞衣郎  
風傳蕙帳聲猶裊月落芝田影漸長  
却怕茶烟生一縷等閒飛去碧沙旁

憶鶴

孤山有月好西湖只問湖中鶴在無  
頤閣瘦軀三尺半聲搖殘夢四更初  
青田別去何由見赤壁飛來不受呼  
寂寞小齋誰作伴賽蘭香裊舊團蒲

謝惠壺

江上花邊到一壺春風日日要人扶  
數篇栗里乃何趣五斗高陽非酒徒  
春事無多花去眼老形已具雪添鬚  
醉鄉著我扶溪老白壁黃金惠不如

題閒叟

前村烟火熟朝炊正是先生睡足時身在江山人在畫  
目窮今古世爭棋花邊擊鼓諸孫戲竹下扶筇一鶴隨  
應笑書生閒未得白頭憂世欲何為

游心樓為丁縣尹作

城外青山樓外城城頭山勢與樓平坐來白日心能靜  
看到浮雲世亦輕高閣祇宜封斷簡半年方許讀西銘  
乾坤一點龍門意分付當年尹彥誠



次莊定山清江雜興

家學華山一覺眠圖書亦在枕頭邊  
傍花隨柳我尋句  
剩水殘山天賜年  
竹徑旁通沽酒市  
桃花亂點釣魚船  
平生我愛孫思邈  
自古高人方又圓

中秋夜示江右李劉二生

勝會古來非獨今  
兩生尊酒喜同斟  
且看溟海中秋月  
莫動匡廬半夜心  
天道端須憐主客  
浮雲不敢弄晴陰  
堯夫獨愛梧桐上  
萬籟無聲意自深

辭修縣志

噓嗟文獻荒涼久著述圖經長老宜令尹高才應處分  
病夫何者敢聞知嘗聞司馬開班范直似家翁詔小兒  
史體所闕無大小千秋麟筆寄宣尼

寄李九淵

黃花開盡不持醪更對黃花讀楚騷江閣影流西日轉  
海鴻聲引北風高大寒天地猶堪出垂老筋骸總厭勞  
嗟我與君同甲子鏡中誰讓長霜毛

次韻梅侍御贈別

朱絃一弄白雲深  
山水何人共賞音  
老去布裘偏愛日  
春來花樹不宜陰  
兩端妬復雖天道  
一體乾坤是此心  
扶病寒江遠相送  
古柳葉脫北風吟

贈同遊馬玄真伍伯饒甥舅

江流東與海潮通  
江去潮來今古同  
巖洞風光詩卷裏  
天涯歲月釣船中  
老甥動止常隨舅  
小友心情愛傍公  
更約鐵橋窺險絕  
筆床琴匣未須封

立春日呈丁縣尹

浮生五十五回逢青帝來朝駕自東  
草色向江先自綠  
桃花臨路為誰紅  
高堂滿獻曾孫酒  
小邑初移令尹風  
身著斑衣啼又笑  
老來真個是兒童

元夕

欲將斗柄作垂鈎  
高掛銀蟾照九州  
皇帝萬年臨宇宙  
羣黎無處不歌謳  
兩間和氣氤氲合  
五色卿雲爛漫浮  
一曲昇平人盡樂  
老夫林下更何求

賀冠者

都老門前十丈松  
采帷高映日瞳矐  
賓迎一徑桃花裏  
春在三加酒琖中  
禮式未忘洪武化  
絃歌還動子游風  
主人不用投壺勸  
醉倒江門老石翁

寄高知縣

下疑河岳上星辰  
何處勾連得此身  
天上未旌強項令  
督郵多見折腰人  
青天白日孤城曉  
碧柳黃鸝萬井春  
澗底菖蒲真未有  
堪君服食更通神

次韻伯饒見示養內之作

小結菴居不化緣  
牽蘿架石兩三椽  
一函玉笈飛霞裏  
半枕華胥語鳥邊  
東老豈知丹是酒  
今人多以管窺天  
市中買得叅同契  
萬遍千週然未然

次韻荅伯饒見拉出釣

好共溪山結晚緣  
竹枝深夜響漁椽  
風清月朗滄溟外  
魚躍鳶飛枕几邊  
茶竈烟銷回野艇  
竹竿霜冷釣秋天  
少年孟浪東西走  
衰病于今恥復然

苦熱

尋常衣汗濕青荷爭奈連朝溽暑何  
四象陰陽分老少  
一年天地幾中和  
水枯瓦沼蛙將徙  
日炙山枝鳥不歌  
一事傷廉非得已  
竹林水簟受風多

寄林虛窓

蒼梧酒興未消磨  
又向江門鼓枻歌  
鳥見畫來高畫品  
我疑詩巧是詩魔  
輞川樹石愁摩詰  
與可精神動老坡  
開眼也知真有益  
後來歲月悔無多

書睡

林木蒼蒼鳥哺雛江亭春與睡相宜風花已遣新年醉  
氣候還增病叟癡塵世悲歡忘處了浮生日月夢中移  
晨炊未熟無人喚正是飛雲曳杖時

對酒

竹杪風輕瓦雀哀葛巾簫散步階苔放懷自對溪花笑  
好事誰撐酒舫來白髮驚看今日老青春剛到隔年回  
狂心被酒如飛鶴又逐紅雲上玉臺



二仲為隣蔣詡家蕭然鶴髮映烏紗春來歌唱惟消酒  
老去園林尚種花蚤卜居廬依木石不論日月住烟霞  
小齋半夜忘眠處三尺盆池一口蛙

南歸途中先寄諸鄉友

我家久住龍溪上說著龍溪便有情荔子不將梨鬪美  
沙螺休與蟹爭衡江村婦女蕉衫窄市巷兒郎木屐輕  
漫興詩多誰和我樽前忙殺馬先生

不分賓主共林塘脫下朝衫作道裝酒為老夫開甕盎

茗和春露滴旗鎗  
津頭水滿鴛鴦下  
牆背風來枳殼香  
何處與君拚坐久  
萬株花裏小藜床

與謝祐

易生忽與謝生來  
小雨初晴到玉臺  
笑我十年臯席在  
為君今日華門開  
古來委吏非忘魯  
世外高人亦姓回  
滿眼示人人不識  
更從何處話根荄

縣主丁侯約遊圭峯齋次以病不果賦此

笋輿欲出更夷猶  
病入西風汗未收  
書閣水雲聊自晚

玉臺霜月為誰秋主翁愛客杯盤大小吏鳴鞭道路愁  
我有平生筋力在不尋齋次碧峯頭

懷古

五斗之粟可以生折腰殆非賢所能即生斯世須妨俗  
莫道前身不是僧廬阜社中期滾滾潯陽菊畔醉騰騰  
南山歌罷悠然句誰續先生五字燈

茶蘼花開有懷同賞

看花何處發孤吟墻角茶蘼又破金紫艷照人今日態

香風吹夢隔年心多情酒伴何來晚得意遊蜂入每深  
病起南窓坐終日獨憐涓滴未成斟

次韻林先生潮連館中見寄

烟村渺渺樹成行社屋三間是講堂竹葉林中堪送老  
菊花籬下又逢霜膳夫問煮魴魚美田舍邀嘗早稻香  
入社撚鬚誰最數共尋佳句答年光

祖母年高令伯歸白雲丹陛共霑衣小臣去國身多病  
聖主留心日萬幾一飯未能忘補報百年終是懶依違

白頭恐負垂髫志記得城西就館時

夜坐因誦康節詩偶成

窓竹蕭蕭正晚風溪星耿耿又秋蟲一瓢豈肯方顏子  
千首將無有邵雍恨月嘯花都大雅鳶飛魚躍一中庸  
無人不羨黃陳輩高步騷壇角兩雄

家兄往東向村收蚤稻登舟後雷雨大作章侍坐  
貞節堂至夜分以為憂是年甲辰家兄六十一未  
嘗有如意之求

花甲人間亦易回  
吾兄懷抱幾時開  
雲師暫引秋帆去  
風伯還將暮雨來  
社酒香消荷葉冷  
楚歌聲起竹枝哀  
天公遺我多愁事  
貞節堂邊炒夜雷

丁縣尹惠米時朝覲初歸

病叟山中觀物坐  
長官天上帶春回  
琴堂未必淹三考  
村酤猶堪共一杯  
彩翼雲霄看得意  
白頭供奉愧非才  
如今單父無裨補  
分俸何須到草萊

次韻張侍御見寄

吐月山前坐四更一涼何不獻先生  
鷓鴣翅短那能去  
駿馬蹄輕只欲行見舞綠蓑知我醉  
聽吟素練是君清  
許尋舊雨江門下秋晚不來空寄聲

赤松黃石皆留侯回首丹丘是故丘  
明月波間休擊楫  
白蘋洲上有眠鷗誰家風雨花無恙  
萬古江河水自流  
百尺樓中朝引望望中去馬更來牛

聞張廷實謝病歸寄之

老夫衰病託滄溟不道滄溟亦有爭  
正是黑頭堪入仕

金仙八卷七  
初登黃甲最知名君當出我一頭地我更期君萬里程  
聞說朱明丹已熟扁舟同作訪醫行

偶憶夢中長髯道士用一囊貯羅浮山遺予戲作  
示范規

飛雲萬丈來冥冥囊括誰將隻手擎南極回頭一閣老  
鐵橋有路中天行山通碧落神明衛地有丹砂草木靈  
若個長髯應識我古來真隱不知名

九節之筇手所持兩年衰病負幽期香爐瀑布還匡阜



碧水丹山自武夷雞犬幾時同馭氣雲霄無日不支頤  
可憐一覺羅浮夢不記長髯道士誰

羅浮道士說軒轅千古風高尚可覘枕上昨宵驚短夢  
人間何處覓長髯誰能愛酒過東老我欲凌虛問海蟾  
四百亂峯南斗下是誰囊括到茅簷

夜坐

半屬虛空半屬身細縕一氣似初春仙家亦有調元手  
屈子寧非具眼人莫遣塵埃封面目試看金石貫精神

些兒欲問天根處亥子中間得最真

不著絲毫也可憐何須息息數周天禪家更說除生滅  
黃老惟知養自然昔與蜉蝣同幻化祇應龜鶴羨長年  
吾儒自有中和在誰會求之未發前

次韻張廷實謝病後約遊羅浮見寄

滄浪共擬一桴浮欲所扶桑作釣舟箕穎舊知堯舜大  
留侯初伴赤松遊空中鶴爪挈雲上橋下泉聲洗鐵流  
却憶平湖林縣博僊山從我竟何由

胸中千頃著南溟何物岑蹄菴愛爭但得百千同買醉  
不曾三十便收名鶯花衮衮新搜句烟水茫茫舊路程  
莫倚芳容欺老病手扶青玉並君行

與謝胖

風波來往十年身舊事淒涼不可陳當道豈非鉤距手  
青山不問打眠人酒醒旅館城南月夢破茆茨海角春  
何日定攜妻子去水田稼好最娛親

夢崔清獻坐床上李忠簡坐床下野服搭颯而予

參其間

清獻堂堂四百春夢中眉宇識天人報君西蜀清油幕  
老我東籬白葛巾萬里歸心長短賦九天辭表十三陳  
南風欲理增江棹也借青山卜墓隣

公在蜀中嘗賦水調歌頭一篇其辭曰萬里雲間  
成立馬劒門關亂山極目無際西北是長安人  
苦百年塗炭鬼泣三邊鋒鏑天道久應還手寫  
留屯奏炯炯寸心丹對青燈搔白髮漏聲殘老

來勲業未就妨却一身閒蒲澗清泉白石梅嶺  
綠陰青子怪我舊盟寒烽火平安夜歸夢到家  
山夢中對菊坡論舉此詞故中聯及之

宋史記中堪列傳菊坡門下豈無人彈文驚世頻登閣  
散髮從師懶著巾嶺海一星元屬李古今全筆總歸陳  
山齋夢破今何在夜半歌聲徹四隣

館廷實進士於白沙社率爾成章兼呈丁明府

壇有青松埭有花烟籠寒水月籠沙人間何處堪棲鳳

歲次今年正屬蛇樹杪看山橫半面水邊尋路入三义  
高軒若肯終年住應沒閒愁上鬢華

廷實偕丁明府遊圭峯雨中奉寄

脚頭到處是天台多少風光在草萊花縣偶攜明府去  
玉臺還少道人來清流赴海無千里白骨封苔有幾堆  
對雨一樽須強飲為君呼起鼻中雷

次韻鄉人送酒

四時功德正恢台仲蔚門前十畝萊恨我未能終日醉

夫君又送一尊來江山雨過聊供眼書卷年深謾作堆  
午枕南風吹不醒可能破柱作驚雷

廷實歸贈以瑞香之花次韻留別

是誰溪裏放船來溪月隨身上海臺衰骨可供連日語  
後生真有不羈才笑呼白鳥同詩社旋掬清流當酒杯  
欲贈夫君何所有畫闌新帶瑞香回

番陽丘先生遠示傑作二章仰仰垂愛之厚感慰  
兼極章衰疾龍鍾無足為故人道者勉據來韻少

布區區之忱耳倘過遼陽之便假手錄寄以發克  
恭黃門一笑幸甚

昔從天上拜彤庭一別官河幾度冰豈有文章供史館  
漫將袍笏對山靈數株松菊猶三徑兩棹風烟又八溟  
欲寫漁翁寄廬阜眼中誰解辨丹青

綠水青山置我曹江西遼左一神交短籬霜菊誰供酒  
破屋秋風自補茆勲業都歸窓下枕行藏更問易中爻  
痴兒多病慈親老不向清時歎繫匏



西良容君攜孫來訪

不見夫君心緒亂，忽過茅宇鬢毛斑。  
稚孫看弄窓前筆，魴子忘歸月下灣。  
衰病欲尋西華枕，舊遊半落北邙山。  
洛陽詩酒耆英社，分付江門主客間。

次韻定山先生種樹

東崦芳菲已碧桃，更移紅杏占西坳。  
每逢好雨扶筇看，不要先生抱甕澆。  
與一野僧吟憩石，無諸俗事坐持醪。  
不將物我來分別，觀化于今是幾遭。

橋下泉流十丈窪橋頭草屋萬株花  
闌闌終日鳥鳴樹  
歲歲春風人在家何處三杯歌浦口  
夜來一夢在天涯  
尊前不見滄溟濶浩浩還君一笑誇

花時風日美新晴北汧南垞迤邐行  
春色酣酣薰我醉  
年光衮衮歎人生竹林背水題將遍  
石筍穿沙坐欲平  
客問定山何所有滿山紅紫數聲鶯

題畫王太姥像壽家慈八十一

三元甲子不須論帝遣長生住此村  
花水前頭瞻太姥

雲霞裏面拜曾孫一天星彩分南極千歲桃花發舊根  
議擬人間都未是壺中自有一乾坤

至日病初起

至日哦詩起坐床梅花牆角為誰香暖臍一盞金櫻酒  
降氣連朝附子湯旋整巾裳還客拜未堪歌舞趨孫狂  
赤藤杖點廬岡石向晚猶須望八荒

兩度書雲傍玉臺不才知幸乞恩回梅花果解撩詩思  
弓影何須落酒杯四大形骸從老去一年風日想春來

眼前不獨南枝早未臘江桃也爛開

睡足龍溪舊草堂晨開東牖望扶桑四方雲物書同日  
半夜梅梢度一陽行不愧人貧亦樂藥能除老瘦何妨  
春來試約張東所何處投竿弄渺茫

山人家世本陳搏供奉何堪晚得官菽水可寬垂老意  
江山不比向來看教兒別煮新年藥問客能食老菜盤  
欲上飛雲更何日典裘沽酒掛驢鞍

殘菊寄兼素

此菊自九月  
江昇來

徙檻編籬與護持  
託根何謝九江時  
數花寂寞元高品  
一賞延緣有舊知  
把酒忽驚今日意  
食英誰弔古人悲  
風霜未改微馨在  
看到玄冬復幾詩

晨起將出尋梅

朝烟橫野犢鳴陂  
索杖山齋睡起時  
田父許留今日酒  
梅花不欠去年詩  
衝寒索笑來何處  
帶病尋香出每遲  
彷彿西湖夢中見  
水邊籬落忽橫枝

半樹橫枝太逼真  
暗香疎影亦傳神  
芝蘭失寵元無雪

桃李生嫌更媚春老幹最宜千丈石香風不動九衢塵  
相思滿眼天涯暮迢遞無因寄遠人

虬枝高望鐵橋開稟氣寰中寡所諧樵塢夜寒花索酒  
山厨香近月橫階何處畫圖空議擬他時羹鼎絕安排  
相逢也恨孤山淺那得詩情到簡齋

村南入路細縈蛇注目寒江不見花遠樹帶煙風裊斷  
長稍離岸石鉤斜看來欲洗溪邊竹折去須乘水上槎  
買地結庵何處所老梅今擬作東家

輓勅總兩廣軍務都御史郴陽朱公

十年持節嶺西東  
奏疏金門月幾封  
都府清虛如到寺  
家徒冷淡不隨公  
瘡痍已拯人間溺  
經略還收戰外功  
猶與後時憂餽餉  
羨餘不以獻重瞳

髮疎齒豁瘴天涯  
已道頭顱事可知  
萬里忽聞徵召起  
九泉應恨乞歸遲  
事方年少常如鈍  
慮過時人忽似痴  
愛惜餉軍三十萬  
至今猶繫陝人思

楚天春望思難任  
生死交情祇自深  
豈有鵬程高萬里

故收駿骨破千金姓名叨入黃公傳  
絮酒空懷孺子心  
拂拭孤桐向明月哀絃彈絕不成音

太子少保誠庵朱公歸葬郴陽適會憲長陶公遣  
生員陳諫偕景暘往祭其墓遂併以公意作詩贈  
之

銘旌前日別金臺故吏門生安在哉  
黃葉孤村荆桂老  
青山連騎越香來人思舊德聞吹笛  
鳥避新阡下啄苔  
欲了平生功德狀到時須打墓碑回



黃金誰問買端溪羊祜殘碑我解題一飯可忘公吐握  
千秋遺愛廣東西寒瀧急雨飛濤惡夜峽啼猿哭月低  
不為高堂兼卧病天涯絮酒肯教攜

讀張進士輓丁明府彥誠詩次韻

六年官守斃諸難七月孤兒護一棺作縣未逢真事會  
濟人初試小還丹思張公道多違俗入叙年勞不轉官  
今日桐鄉須愛我還公俎豆黃雲間

寄莊定山兼謝藥鼎祭器

青燈白馬共延緣半樹梅花一大顛

謂太虛師

色笑親公剛

一月江山別我忽三年懸車有病時將晚辟穀無方意  
可傳祭器遠來人不見夜焚香炷拜青天

易柳訃至乞書銘旌

三年不欺白沙扉病枕春來耗亦稀天地無窮流水遠  
江山猶是昔人非羣賢半逐春雲散老淚還隨暮雨飛  
八字銘旌吾敢愛知君不愧舊儒衣

謁諸墓

宿草荒墳祇自悲百年心事欲奚為  
券堂有鼠能穿地神道無人可假碑  
數口仍憂開歲給一錢未領到官支  
赤泥淺土嗟何及早晚床金盡一揮

悼林琰

青湖山下抱琴回人道藩籬自此開  
澡雪果嫌身抱柱甘眠真有鼻呼雷  
塵埃衮衮荒書課鴻鵠翩翩落酒杯  
多謝急難兄弟好為收遺骨塋蒿萊

扶胥早寄坐中身晚入黷宮忽四春  
放意自名狂者事

到頭誰是醉鄉人  
世緣可徇聊同俗  
習氣難除每喪真  
聞道平湖歸漸近  
相逢空有一沾巾

景雲如郴陽未返懷之舊韻

曲江忠襄鄉先達  
過兩廟拜看留題  
烏還英德山當面  
人向芙蓉路更西  
蓋頂拂霜羸馬怯  
擔頭衝雨跛奴低  
西風兩眼龍門淚  
灑向桂陽何處溪

袁侍御夜過白沙

萬里心期共杳然  
春風何處酒相延  
霜臺白髮三千丈

草閣青燈十九年  
酩酊放歌聞浦口  
支離從事說南川  
乾坤此意誰拈出  
盡是庖羲未畫前

候緝熙

何日江邊艤畫航  
春風先客到林塘  
鳥性亦知長傍樹  
人情莫甚久離鄉  
蕭蕭白髮春還短  
悄悄丹心老更長  
不負平生袁御史  
嶺南無地著秋霜

悵望春江醉欲呼  
諸君還契此機無  
花開小泝供持酒  
水到垂楊可繫臚  
暮景何勞方伯玉  
前程端勿問平湖

故鄉不似前回別江閣青燈對老夫

近陞憲副翁公以占城國主自海南來省過白沙

索和李黃門諸公韻

炎氛莫近使君驂清雨為洗瘴天南聖朝簡畀公何忝  
長夏驅馳老尚堪林下朝朝還暮暮水邊兩兩復三三  
忽逢海上蠻王過又把新聞續舊談

陳白沙集卷七